



Republika e Kosovës – Republika Kosova  
Paneli Zgjedhor për Ankesa dhe Parashtresa  
Izhorni Panel za Žalbe i Predstavke



ZL.Anr.170/2017

**Paneli Zgjedhor për Ankesa dhe Parashtresa (PZAP)**, në panelin e përbërë nga gjyqtarët: Gyltene Sylejmani kryesuese, Afijete Sada dhe Adnan Konushevi anëtarë, me pjesëmarrjen e zyrtares së lartë ligjore Florije Krasniqi, duke vendosur përkitazi me ankesat e subjektit politik Lidhja Demokratike e Kosovës (LDK), me seli në Prishtinë, dhe ankesën e subjektit politik Partia Demokratike e Kosovës (PDK), paraqitur kundër subjektit politik Lëvizja Vetëvendosje (LVV), me seli në Prishtinë, për shkak të shkeljes së Kodit të Mirësjelljes, për Subjektet Politike, Mbështetësit dhe Kandidatët e tyre për Zgjedhjet Lokale që do të mbahen me datë 22.10. 2017, në seancën e panelit të mbajtur me 17.10.2017, mori këtë:

## V E N D I M

**I. Pranohen** si të bazuara ankesat e subjektit politik Lidhja Demokratike e Kosovës (LDK), me seli në Prishtinë me numër ZL. Anr. 170/2017 e datës, 10.10.2017, ZL. Anr. 187/2017, ZL. Anr. 188/2017, ZL. Anr.193/2017 te datës 11.10.2017, ZL. Anr. 222/2017 e datës 14.10.2017, dhe ankesa e subjekti politik Partia Demokratike e Kosovës (PDK) me seli në Prishtinë, me numër ZL. Anr.186/2017 e datës 11.10.2017. Subjektit politik Lëvizja Vetëvendosje (LVV), me seli në Prishtinë, i shqiptohet dënimi më gjorbë në shumë prej 7,500.00 (shtatë mijë e pesëqind) euro, për shkak të shkeljes së Kodit të Mirësjelljes për Subjektet Politike, Mbështetësit e Tyre dhe Kandidatët të cilën gjorbë detyrohet ta paguaj në afat prej 15 (pesëmbëdhjetë) ditëve, nga dita e pranimit të këtij vendimi nën **kërcënim të përmbarimit**.

**II. Urdhërohet** subjekti politik Lëvizja Vetëvendosje (LVV), që brenda afatit prej 24 orëve nga pranimi i këtij vendimi, që ta përmirësoj shkeljet e përcaktuar si në pikën -I- të dispozitivit të këtij vendimi, në të kundërtën mund të sanksionohet me dënim shtesë nga PZAP-i .

## A r s y e t i m

Lidhja Demokratike e Kosovës (LDK), me seli në Prishtinë, ka parashtruar 5 ankesat me numër ZL. Anr. 170/2017 të dt. 10.10.2017, ZL. Anr. 187/2017 të dt. 11.10.2017, ZL. Anr. 188/2017 të dt. 11.10.2017, ZL. Anr.193/2017 të dt.11.10.2017, ZL. Anr. 222/2017 të dt.14.10.2017 dhe 1 ankesë e parashtruar nga subjekti politik Partia Demokratike e Kosovës (PDK) me seli në Prishtinë numër ZL. Anr.186/2017 e dt.11.10.2017 në PZAP, në të cilat pretendohet se subjekti politik LVV, për qëllime elektorale në hapësirat publike si: në oborrin

e Postë Telekomit të Kosovës, në rrugën Xhorxh Bush, tek katedralja “Nëna Terezë”, në rrugën “Justiniani”, tek çerdhja e fëmijëve “ Xixëllonjat”, në rrugën” Bill Klinton” në lagjen Dardania, në rrugën “ Luan Haradinaj” tek New Born në Prishtinë si dhe në sheshin “Ukë Meha” në Mitrovicë, kanë vendosur objekte-tenda në hapësira publike veprime të cilat janë në kundërshtim me nenin 33 pika b) të LZP-së, si dhe në rrugën “Shefki Kuleta në Fushë Kosovë, ku kanë vendosur një tavolinë në rrugë publike nga ku dhe shpërndahen materialet zgjedhore nga ky subjekt politik për Zgjedhjet Lokale 2017.

Në mbështetje të pretendimeve ankimore, ankuesit kanë bashkangjitur disa fotografi, nga secili vende ku pretendohet të kenë ndodhur shkeljet e Kodit të Mirësjelljes për Subjekte Politike, Mbështetësit e tyre dhe Kandidatët.

Në përgjigjet në ankesë të ofruara nga subjekti politik LVV brenda afatit të paraparë, theksoi se Subjekti politik LVV, sipas nenit 4 të Rregullës së KQZ-së nr. 13/2013 kanë dorëzuar Formularët për Njoftime për mbajtjen e tubimeve politike tek Zyrtari i Lartë Komunal i Zgjedhjeve-ZLKKZ si dhe tek Drejtoria e Shërbimeve Publike, Mbrojtje dhe Shpëtim, për miratim, dhe të njëjtit iu ka lejuar të vendosin tendat dhe tavolina në vendet e lartcekura nga ana e LVV-së. Pas pranimit të urdhrave për përmirësim të shkeljeve nga ana e PZAP-it, subjekti politik LVV nuk ka ndërmarrë masat përmirësuese, duke u arsyetuar se të njëjtit posedojnë leje nga KKZ për vendosje dhe nga Drejtoria e Shërbimeve e Komunës së Prishtinës, Komunës së Mitrovicës dhe Komunës së Fushë Kosovës, dhe për të dëshmuar pretendimet e tyre, përgjigjeve iu kanë bashkangjitur kopjet e Formularëve si dhe pëlqimet e lëshuara.

Paneli i PZAP -it, në bazë të nenit 8.3 të Rregullave dhe Procedurave të PZAP-it, ka bashkuar ankesat e lartcekura dhe i trajton si një ankesë evidentuar me ZL.Anr.170/2017, për shkak të ekonomizimit të procedurës, pasi kemi të bëjmë me karakterin e njëjtë të rasteve, ankesat janë parashtruar ndaj të njëjtit subjekt politik dhe kanë pretendime të njëjta ankimore.

Paneli, pasi që shqyrtoj të gjitha shkresat e lëndës në kuptim të nenit 117 par. 2 të LZP-së, gjeti se:

### **Ankesat janë të bazuara**

Paneli nga fotografitë e ofruara si provë nga parashtruesit e ankesave të cilat gjenden në shkresat e lëndës, ka vërtetuar se subjekti politik LVV, për qëllime elektorale kanë vendosur objekte-tenda në hapësira publike si: në oborrin e Postë Telekomit të Kosovës, në rrugën Xhorxh Bush, tek katedralja “Nëna Terezë”, në rrugën “Justiniani”, tek çerdhja e fëmijëve “ Xixëllonjat”, në rrugën” Bill Klinton” në lagjen Dardania, në rrugën “ Luan Haradinaj” tek New Born në Prishtinë dhe në sheshin “Ukë Meha” në Mitrovicë, ndërsa në rrugën “Shefki Kuleta në Fushë Kosovë, është vendosur një tavolinë në rrugë publike nga ku dhe shpërndahen materialet zgjedhore nga ky subjekt politik, për Zgjedhjet Lokale 2017.

Nga dëshmitë e sipërcituara paneli në mënyrë të sigurt dhe padyshimtë, ka vërtetuar se nga subjekti politik Lëvizja Vetëvendosje, me seli në Prishtinë, janë bërë shkeljet e Kodit të

Mirësjelljes për Subjekte Politike, Mbështetësit e tyre dhe Kandidatët, nga fakti se, tendat dhe tavolinat e vendosura në hapësirat publike, paraqesin veprime të sanksionuara me dispozitën e nenit 33 pika b) e LZP-së, e cila përcakton: *“Gjatë periudhës së fushatës, subjekti politik, mbështetësit ose kandidatët e tij, ndalohen vendosjen e njoftimeve, pllakave dhe posterave ose përndryshe vendosja e emrave të tyre ose e sloganeve në lidhje me fushatën zgjedhore brenda ose jashtë hapësirave ose ndërtesave të zëna ose, ndryshe, që shfrytëzohen nga organizatat ndërkombtare, ose brenda ose në hapësira private pa lejen e pronarëve ose shfrytëzuesve.*

Nga arsyet e theksuara më lartë, ankesat e parashtruara nga subjektet politik Lidhja Demokratike e Kosovës (LDK) dhe Partia Demokratike e Kosovës (PDK), u miratuan si të bazuara pasi që pretendimet në ankesa janë të bazuara në fakte bindëse ku vërtetohet se subjekti politik Lëvizja Vetëvendosje ka bërë shkeljen e Kodit të Mirësjelljes. Paneli, vendimin e tij e mbështeti në dëshmi të qarta dhe bindëse siç përcaktohet me nenin 117 par. 3 të LZP-së, prandaj pretendimet në përgjigje në ankesë nuk u cilësuan me ndikim në meritat e lëndës.

Parashtrimet në përgjigje në ankesë, se veprimet e subjekti politik LVV nuk mundë të sanksionohen si shkelje e Kodit të Mirësjelljes, për arsye se Zyrtarët e Lartë të Komisionit Komunal të Zgjedhjeve, i kanë miratuar kërkesat e subjektit politik LVV për mbajtjen e tubimeve politike dhe nga Drejtoria e Shërbimeve e Komunës së Prishtinës, Komunës së Mitrovicës dhe Komunës së Fushë Kosovës, iu është lejuar vendosja e tendave në hapësirat publike nga data 30.09.2017 deri më 20.10.2017 nga ora 11:00-20:00, Paneli pretendimet e tilla i vlerësoj si të pa bazuara dhe si të tilla i refuzoj pasi që me këto prova nuk justifikon veprimet që janë të ndaluara dhe në kundërshtim me dispozitat ligjore të Nenit 33 pika b) i LZP-së, si dhe neni 5 paragrafi 1 pika d) e Rregullës 13/2013 ku parashihet se subjektet e certifikuar politike aktivitetet e tyre zgjedhore duhet t'i bëjnë ne pajtueshmëri me Rregullat zgjedhore të Komisionit Qendror Zgjedhor (KQZ), Kodin e Mirësjelljes, të nxjerrur nga Komisioni i Pavarur i Mediave dhe ndonjë legjisllacion tjetër në fuqi. Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit .

Paneli me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat për rastet: natyrën e shkeljes dhe ndikimit të mundshëm të saj në procesin zgjedhor në fjalët, shkallën dhe peshën e shkeljes, pjesëmarrjen e subjekti politik në zgjedhjet e mëparshme që konsiston në faktin së LVV-ja, ka qenë e njoftuar me obligimet dhe përgjegjësit gjatë procesit të fushatës, shkeljet e ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore si dhe shumën e fondeve që ka marra subjekti politik prej Buxhetit të Republikës së Kosovës, për zhvillimin e aktiviteteve lidhur më fushatën zgjedhore. Po ashtu si rrethanë, PZAP-i, mori edhe faktin që këtij subjekti, ia dha mundësinë për tu përgjigjur ashtu që në përgjigjet e tij ka mohuar shkeljet e supozuara. Mos ndërmarrja

e masave përmirësuese ka ndikuar në lartësinë e gjobës së shqiptuar si në dispozitiv të këtij vendimi .

Paneli konform nenit 120.1 pika a) të LZP-së urdhëroi subjektin politik LVV që të marrë masa dhe të përmirësoj shkeljet në afatin prej 24 orëve dhe nëse subjekti politik LVV nuk vepron sipas urdhrin të panelit do të sanksionohet me dënim shtesë nga PZAP-i , në pajtim me nenin 120.2 të LZP-së.

Paneli në kuptim të nenit 120.1, pika c), dhe nenit 118.1, të LZP-së, vendosi si në dispozitiv të këtij vendimi.

**Paneli Zgjedhor për Ankesa dhe Parashtresa**

Zl.Anr. 170/2017 më datën 17.10.2017

**Kryesuesi i Panelit  
Gyltene Sylejmani**



***Këshillë Juridike:*** Kundër këtij vendimi është e lejuar ankesa sipas nenit 118 par. 4 të LZP-së, në Gjykatën Supreme të Kosovës, brenda njëzetekatër (24) orëve nga momenti i marrjes-pranimin të këtij vendimi.